



Bentiaraq Ottosen

UPA 2026/129

Atassut

17. Juni 2026

Nunatsinni namminersorneq pillugu inatsit qanoq nutarterneqarsinnaanera ullutsinnut naleqqussarlugu apeqquteqaat aallaavigalugu siunnersuut.

(Inatsisartunut ilaasortaq, Aqqalu C. Jerimiassen, Atassut)

Qularutissaanngilaq Namminersorneq pillugu inatsit Nunatsinnut nammineq aalajangiinnaassusitsinnut annertusaasimasoq aammalu politikikkut ineriartornitsinnut pingaarutilimmik tunngaviliisimasoq. Taamaattoq 2009-miit ullumikkumut nunarsuaq allaanerujussuovoq, taamaattumillu aamma sapiissuseqartariaqarpugut inatsisip qanoq nutarterneqarsinnaanera aammalu ullutsinnut naleqqussarneqarsinnaanera pillugu oqallinnissatsinnut.

Nunatta siunissaa pillugu eqqarsaraanni aqutissat pingasuupput.

Siulleg tassaavoq namminersorneq pillugu inatsit ullumikkutut isikkoqartillugu allanngortinnagu atuutsiinnarlugu.

Aappaa tassaavoq namminersorneq pillugu inatsimmi § 21 naapertorlugu kalaallit inuiaqatigiit namminneq aalajangiinnissaat tunngavigalugu namminiilivinnissaq aqutigalugu ingerlaqqinnissaq.

Pingajuallu tassaavoq Namminersorneq pillugu inatsit Danmarkimut nutaamik isumaqatiginninniarnikkut nutarterneqarnissaa, taamaalilluni Nunarput aningaasaqarnikkut, politikikkut aammalu nunanut allanut tunngasutigut annertunerusumik periarfissaqartilissallugu.

Atassummiit isumaqarpugut aqutit pingajuat toqqammavigisariaqaripput.

Namminersorneq pillugu inatsimmik nutarterineq namminiilivinnissamut itigartitsinerunngilaq. § 21 atuutiinnartillugu kalaallit inuiaqatigiit siunissartik namminneq aalajangiiffiguaannarsinnaavaat. Taamaattumik nutarterineq kiffaanngissutsimik killilersuinerunngilaq, periarfissanilli annertusaanerulluni.

Oqareernittuut 2009-mi pissutsit allaapput nunarsuatsinni aammalu naalagaaffeqatigiinnerup iluani, ullumikkut Nunatsinni isumaqarpugut aatsitassat pillugit Namminersoneq pillugu inatsimmi isumaqatigiissutaasimasut naleqqutinngitsut. Aatsitassarsionermit isertitat pillugit aalajangersakkat nalilersoqqinneqartariaqarput, taamaalilluni Nunarput suliffissanik, aningaasaliissutinik aammalu ineriartortitsinermik amerlanerusunik pilersitsinissamut pitsaanerusumik periarfissaqalerniassammat.

Taamatuttaaq nunanut allanut tunngasutigut qanoq annertunerusumik nammineerluta ingerlatsinissamut periarfissaqarnersugut misissortariaqarparput. Namminersorneq pillugu inatsit



atuutilermalli nunarsuarmi pissutsit allanngorujussuarsimapput. EU Kalaallit Nunaannik suleqatigiinnissamut soqutiginninnerulersimavoq, aammalu Nunarput nunani tamalaani pingaaruteqarnera annertusiartuinnarluni. Taamaattumik misissortariaqarpoq Nunarput nammineq soqutigisaminik nunani tamalaani annertunerusumik ingerlatsinissamut periarfissinneqarsinnaanersoq, aammalu suleqatigiinnermi iluaqutaasinnaasut attatiinnarlugit.

Atassut isumaqanngilaq Nunarput ullumikkut nunarsuarmioqataanermini kisimiilluni nukittuumik inissisimasinnaasoq. Paarlattuanik pingaaruteqarpoq Danmarkimik, EU-mik aammalu nunani tamat oqartussaaqataanermik tunngaveqartunik suleqatitsinnik pitsaasunik suleqatigiinnerup attatiinnarneqarnissaa. Suleqatigiinneq taamaattussaannartut isigissanngilarput. Suleqatigiinneq pissutsit nutaat naapertorlugit sinaakkutinik ineriartortitsiffiusaaq.

Taamaattumik Atassut isumaqarpoq Naalakkersuisut misissortariaqaraat namminersorneq pillugu inatsit qanoq nutarterneqarsinnaanersoq, taamaalilluni Nunarput aningaasaqarnikkut annertunerusumik kiffaangissuseqalerluni, nunani tamalaani annertunerusumik sunniuteqarsinnaalerluni aammalu politikikkut annertunerusumik aalajangiisinnaatitaalerluni kinguaariit siunissami nammineq aalajangiisinnaanerat ineriartornerallu sulii annertusarumallugu.

Anguniagaq tassaavoq Nunarput nukittunerusoq, nammineernerusoq aammalu inuiaqatigiit ineriartornissaannik atungarissaarnissaannillu siunertaqartoq.

Taama Atassummiit oqaaseqarlunga oqallilluarnissassinnik kissaallusi.